



SUBMISAUN CIVIL SOCIETY EDUCATION PARTNERSHIP (CSEP) BA PARLAMENTU NASIONAL

I. Introdusaun

Civil Society Education Partnership (CSEP) hanesan redi edukasaun nasional ne'ebe establese iha tinan 2017 husi organizasaun lima ne'ebe servisu iha area monitorizasaun, peskiza no advokasia ba politika edukasaun iha Timor-Leste mak hanesan Instituto Matadalan Integrado (IMI), Action for Change Foundation (ACF), Many Hands One Nation (MAHON), Fundasaun Feto Hadomi Familia (FFHF) no Haburas Dezemvolve Talento (HADEZTA). Iha Dezembro 2018, aprova tan membru NGO foun hamutuk 10 liu husi Assembleia Geral ne'ebe partisipa husi membru nain 10 refere no atualmente CSEP iha ona membru organizasaun sosiedade sivil hamutuk 15 ne'ebe mai husi munisipiu hotu inklui halo servisu iha setor joventude marjinalizadu, labarik vulneravel, ema ho defisiensia, feto no professores

CSEP konsege hala'o ona peskiza no monitorizasaun sira hanesan tuir mai;

1. Youth-led Action Research (YAR-2019) ne'ebe involve joventude marjinalizadu sira iha peskiza refere iha munisipiu hitu (Baucau, Manatuto, Aileu, Ainaro, Ermera, Liquiça no Bobonaro)
2. Monitorizasaun ba Infrastrutura Eskolar iha Munisipiu Ermera
3. Hakerek Spotlight Report on the implementation of Sustainable Development Goals (SDGs) iha Timor-Leste
4. Peskiza ba Impaktu COVID19 ba joventude marjinalizadu sira liu-liu edukasaun, empregu no vida moris iha munisipiu lima (Dili, Liquiça, Manatuto, Baucau ho Aileu)

Liu husi peskiza sira iha leten, CSEP identifika deskobrimentu no hato'o mós rekomendasaun sira hanesan tuir mai;

1. Maioria facilidade eskola sira kuaze 60 – 92 pursentu mak kondisaun ladiak no la sufisiénte ba professor no estudante sira atu hala'o sira nia prosesu aprendizajem hanesan aula la sufisiénte (45-70 estudantes kada aula), kondisaun eskola inklui dezenho eskola nian laiha rampa ba ema ho defisiensia sira atu asesu, laiha laboratoriu prátika, laiha biblioteka, laiha bé no saneamentu, laiha kadera ho meja. Até eskola balu professor ida hanorin aula rua dala ida iha oras hanesan
2. Iha nivel Suku no Aldeia sira iha area rural laiha eskola Pre-Eskolar ida mak existe no balu ne'ebé existe iha nivel munisipiu maibe professor/a sira abandonadu la hetan salariu inklui estudante sira laiha facilidade
3. Joventude feto no mane sira ne'ebé la remata eskola hela iha area rural la bele asesu ba programa Ensino Rekorente tamba laiha facilidade no manorin sira atu fasilita hanorin

4. Universidade Nasional Timor-Lorosa'e (UNTL) kada tinan simu enrolment/rejistrasaun husi estudante graduadu Eskola Sekundáriu, maibé UNTL simu deit menus husi 5,000 estudantes, restu ne'e hili dalan dezempregu/to'os nain tamba universidade privada sira selu karun liu. Nune'e, laiha tán opsaun seluk atu kontinua eskola mezmo eskola ne'e hanesan direitu fundamento ida iha RDTL. Iha tinan 2020 nia laran, iha Timor-Leste sei gradua liu 50,000 estudantes husi eskola sekundariu sira. Sira ne'e maioria 99% sei la ba kontinua estuda iha rai liur tamba situasaun COVID19, UNTL sei sai hanesan opsaun primeiru, ida ne'e sei difikulta liu tan.
5. Professor sira kuaze 4,000 resin mak sei asumi estatutu Kontratadu no laiha serteza bainhira mak iha mudansa ba sira nia estatutu. Realidade, demanda iha terenu kontinua sai preokupasaun públiku atu ejiji número professor sira barak liu tan hodi jere aula tuir rasio entre estudantes ho professores.

Baseia ba deskobrimentu sira iha lete, maka CSEP hakarak atu rekomenda no ejiji governu hanesan tuir mai;

1. CSEP rekomenda ba Ministeriu Edukasaun Joventude no Desporto (MEJD) no Ministerio Ensino Superior, Siénsia no Kultura (MESK) atu hasaé orsamentu alokadu ba setór edukasaun husi 15-20 porsentu kada tinan hodi responde ba difikuldade hirak mensiona iha leten.
2. CSEP mos rekomenda ba membru governu sira atu redus despezas ne'ebé aloka barak liu ba perdiam, sosa kareta, ense mina, vaizen lokal no ami sujere atu iha komitmentu diak ba desenvolvimentu setor edukasaun liu-liu eskola públiku sira.
3. CSEP hare iha kuaze eskola sira hotu sei iha nafatin professor ho idade tama ona terseira idade ou idade reformadu maibe sira sei hanorin nafatin no balun hanorin iha eskola kaer aula rua iha tempu hanesan. Ida ne'e ami konsidera pressaun fiziku no mental ba professor sira nia saude.
4. CSEP rekomenda ba governu atu oferese bolsu estudu barak liu tan ba kbít laek nia oan sira atu asesu ba eskola iha nivel hotu no laos deit iha nivel universidade maibe iha mos nivel ensino básico sira iha rai laran.
5. Timor-Leste seidak iha Politika Desenvolvimentu sedu ba Labarik Kiik / Early Childhood Development (ECD) Policy hodi asegura edukasaun no saude diak ba labarik kiik husi nivel rural to'o iha nasional. **CSEP rekomenda ba MEJD atu bele fo prioridade ba politika refere passa iha aprovasaun final iha nivel Konsellu Ministru hodi bele aplika no implementa iha programa governu nian.**
6. CSEP visita ona ba Eskola Téinku Vokasional (ETVOC) iha Dili no iha area rural sira liu-liu ETVOC ne'ebé foin konverte husi Eskola Sekundáriu Jeral iha tinan 2015 no 2016 nia laran maioria implementa la-dún diak no barak liu laiha fasilidade natón atu fasilita prosesu aprendizajem tuir departementu ida-idak hanesan agrikultura, turizmu, arte, siénsia, laboratóriu prátika no seluk-seluk tán. **CSEP rekomenda ba MEJD atu investe iha infrastrutura, rekursu humanu liu-liu professor sira tuir méritu, kadera, meja,**

laboratoriu, biblioteka be no saneamentu atu aseguira kualidade eskola ne'ebé diak ba Timor-oan hotu tantu kbít laek, defisiénsia no povu babain nia oan.

7. CSEP halo ona peskiza kona-bá “Impaktu COVID19 ba vida joventude marjinalizadu, edukasaun no empregu” resultadu peskiza hatudu katak situasaun ne'e pursentu 99 afeta tebes ba joventude sira. **CSEP rekomenda ba governu atu investe iha setór produtivu sira hanesan agrikultura, turizmo, edukasaun no kriasaun oportunidade empregu ba joventude sira.**

Submisaun ida ne'e halo iha Dili; 10 de Novembro de 2020 no asina husi Organizasaun Sosiédade Sivil sira hanesan tuir mai;

1. Civil Society Education Partnership (CSEP)
2. Action for Change Foundation (ACF)
3. Instituto Matadalan Integradu (IMI)
4. Haburas Dezenvolve Talentu (HADEZTA)
5. Fundasaun Feto Hadomi Familia (FFHF)
6. Many Hands One Nation (MAHON)
7. Rural Youth Action (RYA)
8. Joventude Inovativu Timor-Leste (JITL)
9. Organizasaun Haburas Moris (OHM)
10. Fundasaun Dezenvolvimentu Rural (FDR)
11. Unidade Feto ba Dezenvolvimentu (UFD)
12. Fundasaun Esperansa para Futuro (FUNERO)
13. Asosiasaun Halibur Defisiénsia Matan Timor-Leste (AHMDTL)
14. Representante Joventude Marjinalizadu Timor-Leste